

皇
明
詔
制

皇明詔制卷二

奉

天承運

皇帝詔曰昔我

皇父太祖高皇帝龍飛淮甸汎掃區宇東抵虞淵西
踰崑崙南跨南交北際潮海仁風義聲震盪六
合腠爽闇昧咸際光明三十年間九有寧謐宴
駕之日萬方嗟悼煌煌功業恢于湯武德澤廣
布至仁彌流姪允炆以幼冲之資嗣守大業秉

心不孝更改憲章戕害諸王放黜師保崇信奸
回大興土木天變于上而不畏地震于下而不
懼災延承天而文其過煌飛蔽天而不脩德益
乃委政宦官淫佚無度禍機四發將及于朕朕
惟

高皇帝嫡子祖有明訓朝無政臣內有奸惡王得興
兵討之朕遵奉條章舉兵以清君側之惡蓋出
於不得已也使朕兵不舉天下亦將有聲罪而
攻之者允攸曾不反躬自責肆行旅拒荷蒙

天地

宗社之靈戰勝攻克擣之于埧上殲之于白溝破之
于滄州瀆之于藁城鏖之于夾河鞠之于靈璧
六戰已不國矣朕於是駐師畿甸索其奸回庶
希周公輔成之誼而乃不究朕懷闔宮自焚以
自絕于

宗社天地所不庇鬼神所不容事不可已朕乃整師
入京秋毫無犯諸王大臣謂朕

太祖之嫡應天順人天位不可以久虛神器不可以

無主上章勸進朕拒之再三爰乃俯徇輿情已於六月十七日卽皇帝位大禮旣成所有合行庶政並宜兼舉

一今年仍以洪武三十五年爲紀其改明年爲永樂元年

一建文以來

祖宗成法有更改者仍復舊制刑名一依大明律科斷

一奉天征討將士數年以來從朕征討披堅

執銳櫛風沐雨忠義奮發屢戰屢勝翊輔
成功勤勞多矣簡在朕心宜速論功陞賞
用酬前勞

一自洪武三十五年七月初一日昧爽以前
官吏軍民人等有犯除謀反大逆謀殺祖
父母父母妻妾殺夫奴婢殺主謀殺故殺
人蠱毒魘魅毒藥殺人及見提奸惡不赦
外其餘已發覺未發覺已結正未結正罪
無大小咸赦除之敢有以赦前事相言告

皇明詔赦

二二八 洪武三十五年

三

者以其罪罪之

一自洪武三十一年閏五月以後周齊湘代
岷五府被誣陷時文武官員軍民人等連
累致罪者官復原職已故者文官優免其
家差役武官子孫承襲民充軍者復還原
籍爲民軍發邊遠者仍還原衛爲奴者卽
放寧家入官田產照數給還

一遞年爲事買馬煎鹽當站及充遞運所水
夫阜隸膳夫人數一體赦免各放寧家

一建文年間上書陳言有干犯之詞者悉皆
勿論所出一應榜文條例盡行除毀

一山林隱逸懷材抱德之士有司詢訪以禮
敦請赴京量才擢用其有志尚閑逸不願
出仕者具名奏聞

一鰥寡孤獨有司依例存恤母令失所民年
七十之上及篤廢殘疾者許令一丁侍養
有飢寒不能自存者官爲賑濟

一山東北平河南府州縣人民有被兵不能

種田者並免三年差稅不曾被兵者與直隸鳳陽淮安徐州滁州揚州今年秋夏稅糧盡行蠲免其餘直隸府州山西陝西浙江福建江西湖廣兩廣四川雲南蠲免一半其有洪武三十五年七月初一日以前拖欠一應錢糧鹽課段疋木植蘆柴等項及軍民所養馬疋牛羊等項倒死并欠孳生者並免追陪其弓兵砍辦蘆柴者仍優免二年

一河南山東北平淮南北流移人戶各還原籍復業合用種子牛具官爲給付

一北方學校仍依舊制開設毋致廢弛

一建文除授并陞調文武官員仍依見職不動軍官有陞職事者止終本身子孫仍襲原職

一各處新收壯士勇士盡數放還爲民各安生業所設衛分并軍民指揮司盡行革去指揮千百戶衛所鎮撫有係民間并舍人

選用者亦各罷官放還

一諸色人匠除輪當正班外其餘一應撮工人匠俱各放還依次輪班

一各處見造軍器軍裝船隻一切不急之務盡皆停罷今後有司非奉上司明文毋得一毫擅自科擾於民

一自洪武三十五年七月初一日以前軍官爲事充軍及罷閑者赦免軍役復其原職亡故者子孫承襲總小旗革役充軍者各

還原役

一北平衛分官旗人等有因公差或被拘執不得已赴京者皆免其罪

一各處守城官軍有係別衛調到并征進漫散軍士見在他處者各還原衛所本處官司不許留難沮當其奉差守城文武官員及內官人等詔書到日俱各回京

一凡軍民人等男女人口有被官軍拘擄者官爲贖還

一遞年逃軍并征進漫散軍士藏躲山林者
詔書到日爲始限一月之內赴官首告免
罪所在官司發回原衛所着役

一拋荒田土除有人佃種納糧外其無人佃
種荒田所司取勘明白開除稅糧免致拋
荒損民

一所在城市鄉村凡在骸骨有司卽爲收斂
埋瘞毋致暴露

一天下各都司衛所官軍皆

太祖皇帝恩養者奸臣迫脇調遣拒戰衝冒矢石情
有可憫見存者俱還原衛所其有陣亡喪
故失陷病故者官則襲其子孫旗軍每戶
賞鈔五錠戶無壯丁補役遺下寡婦母女
所司善爲存撫願依親還鄉聽從其便有
幼男者給糧紀錄出幼補役

一沿海軍民人等近年以來往往私自下番
交通外國今後不許所司一遵洪武事例

禁治

於戲文帝入漢尚資恭儉之風武王紹周願廣
至仁之化布告天下其體朕懷

洪武三十五年七月初一日

奉

天承運

皇帝制曰昔元末兵興豪傑競起割據土地糜爛生
民

天命我

父皇太祖高皇帝龍飛淮甸東征西討掃除禍亂華
夷一統身致太平垂四十年

父皇賓天建文嗣位頑狠昏昧專任姦回內作色荒
改更成憲殘害宗親將及朕躬朕不得已起兵

自救身親戰陣已經四載賴

天地

祖宗之靈遂平內難爾諸奉天征討將士卧雪眠霜
櫛風沐雨百戰百勝萬死一生報

太祖之深恩弘濟艱難宣力甚多輔成大功仰稽

太祖皇帝開國功臣賞賜等第叅酌得宜論功高下

定爾爵賞朕不敢私在爾諸將亦自知之今封

爾

都督僉事丘福爲奉天靖難推誠宣力武臣

特進榮祿大夫右柱國中軍都督府左都督淇國公食祿二千五百石子孫世世承襲

襲

都督僉事朱能爲奉天靖難推誠宣力武臣特進榮祿大夫右柱國左軍都督府左都督成國公食祿二千五百石子孫世世承襲

都督僉事張武爲奉天靖難推誠宣力武臣特進榮祿大夫柱國中軍都督府都督同

知成陽侯食祿一千五百石子孫世世承襲

襲

都督僉事陳圭爲奉天靖難推誠宣力武臣
特進榮祿大夫柱國後軍都督府都督同知
泰寧侯食祿一千二百石子孫世世承襲

都督僉事鄭亨爲奉天靖難推誠宣力武臣
特進榮祿大夫柱國中軍都督府左都督
武安侯食祿一千五百石子孫世世承襲

都督僉事孟善爲奉天靖難推誠宣力武臣
特進榮祿大夫柱國右軍都督府都督同
知保定侯食祿一千二百石子孫世世承
襲

都督僉事火真爲奉天靖難推誠宣力武臣
特進榮祿大夫柱國中軍都督府都督僉
事同安侯食祿一千五百石子孫世世承
襲

右都督顧城爲肇慶勦運推誠宣力武臣特

進榮祿大夫柱國後軍都督府右都督鎮
遠侯食祿一千五百石子孫世世承襲

都督僉事王忠爲奉天靖難推誠宣力武臣
特進榮祿大夫柱國右軍都督府都督同
知靖安侯食祿一千石子孫世世承襲

都指揮使王聰爲奉天靖難推誠宣力武臣
特進榮祿大夫柱國中軍都督府都督僉
事武城侯食祿一千五百石子孫世世承

襲

都督僉事徐忠爲奉天靖難推誠宣力武臣
特進榮祿大夫柱國前軍都督府左都督
永康侯食祿一千一百石子孫世世承襲
都督僉事張信爲奉天靖難推誠宣力武臣
特進榮祿大夫柱國隆平侯食祿一千石
子孫世襲隆平伯

都督僉事李遠爲奉天靖難推誠宣力武臣
特進榮祿大夫柱國中軍都督府都督同
知安平侯食祿一千石子孫世襲安平伯

都督僉事郭亮爲奉天靖難推誠宣力武臣
特進榮祿大夫柱國左軍都督府都督同
知成安侯食祿一千二百石子孫世襲成
安伯

都督僉事房寬爲思恩侯食祿八百石子孫
世襲指揮使

都指揮使徐祥爲奉天翊衛宣力武臣特進
榮祿大夫柱國興安伯食祿一千石子孫
世世承襲

都督僉事徐理爲奉天翊衛宣力武臣特進
榮祿大夫柱國武康伯食祿一千石子孫
世世承襲

都指揮同知李濬爲奉天翊衛宣力武臣特
進榮祿大夫柱國襄城伯食祿一千石子
孫世世承襲

都督指揮同知張輔爲奉天翊衛宣力武臣
特進榮祿大夫柱國信安伯食祿一千石
子孫世世承襲

都督僉事唐雲爲奉天翊衛宣力武臣特進
榮祿大夫柱國新昌伯食祿一千石子孫
世襲指揮使

都指揮同知譚淵男譚忠爲奉天翊衛宣力
武臣特進榮祿大夫柱國新寧伯食祿一
千石子孫世襲

都指揮孫巖爲奉天翊衛宣力武臣特進榮
祿大夫柱國應城伯食祿一千石子孫世
襲

指揮使房勝爲奉天翊衛宣力武臣特進榮
祿大夫柱國富昌伯食祿一千石子孫世
襲指揮使

都指揮使趙彝爲奉天翊衛宣力武臣特進
榮祿大夫柱國忻城伯食祿一千石子孫
世世承襲

都督僉事陳旭爲奉天翊衛宣力武臣特進
榮祿大夫柱國雲陽伯食祿一千石子孫

世世承襲

都指揮同知張玉追封奉天靖難推誠宣力
武臣特進榮祿大夫右柱國榮國公諡忠
顯

都指揮譚淵追封奉天靖難推誠宣力武臣
特進榮祿大夫柱國崇安伯諡壯節

都指揮僉事劉才爲奉天翊衛宣力武臣特
進榮祿大夫柱國廣恩伯食祿九百石子
孫世襲指揮同知

其曹國公李景隆等忠孝於

太祖扶持

社稷默相事機其功甚大今特加封

曹國公李景隆爲奉天輔運推誠宣力武臣
特進光祿大夫左柱國太子太師曹國公
增祿一千石通前四千石子孫世世承襲
尚書茹瑺爲奉天翊運守正文臣特進榮祿
大夫柱國太子少保兼兵部尚書忠誠伯
食祿一千石

都督同知王佐爲奉天翊運宣力武臣特進

榮祿大夫柱國中軍都督府都督同知順昌伯食祿一千石子孫世襲指揮使

都督僉事陳瑄爲奉天翊運宣力武臣特進榮祿大夫柱國中軍都督府都督僉事平江伯食祿一千石子孫世襲指揮使

其谷王護衛指揮僉事張興儀衛正張成等忠於

太祖受王成算佐成奇功今陞

指揮僉事張興爲驍騎將軍都督僉事

儀衛正張成爲驃騎將軍都指揮使
其餘將士人等論功高下皆在陞賞
其駙馬都尉王寧孝於

太祖忠於國家正直無私不附權勢遂遭誣陷幾致
損身達孝推恩允宜褒顯今以

王寧爲奉天輔還推誠效義武臣特進光祿
大夫柱國駙馬都尉永春侯食祿一千石
子孫世世承襲

於戲人君之職惟在奉

天爵賞之頒豈容私意今以天下之財賞天下之功
民之資力有限名爵之貴無窮故茲賚與亦不
以多少爲輕重或朕知有未盡未滿爾心對朕
自陳若退有後言者於犯法甚不可也但恐爾
等不立功爾今後果能立功至再至三不吝爵
賞朕之此言通于

天地布告爾衆咸使聞知

洪武三十五年九月初四日

奉

天承運

皇帝詔曰朕荷

天地神靈

祖宗庇祐繼承大統華夏肅清稽于古典虞夏殷周
之盛亦資內助以致雍熙朕

皇考太祖高皇帝肇脩人紀惇典庸禮臻茲治平薄
海內外室家相慶功德兼隆與天同運亦惟

皇妣孝慈高皇后效法承天肅雍顯相德配聖人化

家爲國朕奉藩于燕垂二十年正妃徐氏開國
元勳中山武寧王徐達之女佐朕

皇考咸有一德格于

皇天天惟申命用休君臣篤慶榮裕始終毓茲貞淑
嬪于肇封家政輯寧朕恭行天討無內顧之憂
厚德嘉禎壺儀懿範同朕恭勤保茲天命君臨
爾萬姓之上是用於洪武三十五年十一月十
三日命使奉金冊金寶立徐氏爲皇后正位中
宮恭承

宗廟布告天下咸使聞知

洪武三十五年十一月十三日

奉

天承運

皇帝詔曰仁義之推施由親始帝王之治睦族爲先
歷觀往古克洽太平未有不由茲道也昔朕

皇考太祖高皇帝受天明命奄有萬方隆厚親親及
於異姓寰宇同風誠惇孝友乃遵古道封建諸
王藩屏帝室與國咸休允攸無道不孝不君不
耻不仁不畏不義滅絕天理敗壞人倫恣其狂
狠悖祖滅親卽位三年骨肉幾盡周王奉藩守

法循理匡輔朝廷初無罪愆忠不見信以賢見
疑偏聽讒言忽興師旅籍其資財空其宮室害
其官屬周王莫知其由自來京師欲伸枉屈略
不加察卽竄之蠻夷萬里瘴癘之鄉流離道路
父子殊方幽囚苦困穴牆通食體無完衣窮窘
危辱濱於死亡誣構湘王令其闔宮自焚加以
惡謚執齊王於京邸囚代王於大同囚岷王於
雲南日夜所思惟殘賊骨肉之計不盡不饜乃
以懿文太子薨逝之時

皇考欲立朕爲嗣尤所猜忌無繫可圖聽信奸臣縱
兵害朕朕不得已舉兵自救荷

天地神明

祖宗孚佑

皇考之靈兵至畿甸索其奸回允攸自知慙負
天地無顏相見自焚而死諸王臣民尊朕爲皇帝重
念骨肉之親良深存歿之感是用復封周王於
河南齊王於青州湘王賜謚曰獻治其墳廟代
王岷王皆脫拘囚還其封爵秦愍王之子尚舛

言部
封爲興平王尚烜爲永壽王尚斡爲安定王晉
恭王之子濟熿爲平陽王濟煇爲廣昌王周王
長子有燉復爲周世子次子有勳封爲汝南王
有烜爲順陽王有燿爲祥符王有熺爲新安王
有光爲永寧王有燭爲汝陽王有燿爲鎮平王
有焮爲宜陽王齊王之子賢烜爲樂安王賢煖
爲長山王賢寔爲平陽王於戲天有顯道厥類
惟彰善惡之應捷於影響

皇考重分封之意允攸絕骨肉之恩不孝違

天天命殛之今朕奉

天復遵舊制藩屏宗親期百世本支之感山河帶礪
資萬

年盤石之安布告天下咸使聞知

永樂元年正月十三日

奉

天承運

皇帝詔曰朕惟建儲貳固所以定國本茂德器斯可
以繫人心蓋究知前人創立之難乃克勝後世
續承之重昔

皇考太祖高皇帝勞神焦思混一寰宇武功文德誕
開太平至於允炆大逆不孝幾墜邦家尚賴

皇考聖神天眷無間顯相遐祚垂福朕躬克清內難
繼承大統載安

宗社以主神人方惟負荷之難永切憂勤之意惟弟
周王致孝

皇考盡忠國家慮遠以思深屢摠誠而致告謂朕長
子未正東宮宜預立以固皇基當早建以安天
下蓋上則思肇造之甚艱下欲明繼序之永定
誠社稷之大計乃骨肉之至情言之再三意愈
勤懇但長子學問未廣德業未充必有以厭衆
心乃可以主神器俟詢采正人簡登賢俊庶幾
輔導有成正名未晚所請不允

永樂元年四月初四日

皇明詔赦

二八 永樂元年

壬

奉

天承運

皇帝詔曰朕惟帝王盛德皆因實以著名達孝尊親
必揚名而顯實此放勳重華所以贊堯舜而宣
哲於皇所以頌文武也洪惟朕

皇考皇帝聰明神武俊德格天至誠膺合於乾剛光
大寔侔於坤厚固天縱之至聖膺曆數之在躬
當元運之訖祿四海紛紜強暴相凌生民塗炭
憫墊溺之莫拯奮一劍以龍興曾無寸土一民

之階自有英雄萬國之會汎掃塵氛奠安寰宇
不數載而成帝業乃一舉而治太平制禮作樂
典章煥乎重新用夏變夷人文蔚其宣朗東西
際日月之出沒南北極寒暑之幽遐咸蒙覆幬
均被沾濡四十餘年德教洋溢淳風熙皞自生
民以來未有盛於

皇考皇帝者也

皇妣孝慈皇后齊莊懿淑恭儉仁孝誕符景運作配
至尊弘濟艱難化家爲國盡其誠敬之心以奉

神靈之統輔成內治表著母儀極天下之富貴
曾何加于其身躬蠶桑以爲常服澣濯不爲異
有樛木逮下之德致螽斯多男之祥雖嬀汭嬪
虞塗山啓夏桀娥擘殷摯任興周蹟同開創實
莫與京自古后妃未有盛於

皇妣孝慈皇后者也仰惟

二聖之鴻休允合兩儀之大德日月于邁深切孝思
念名號未稱乎功德典禮必在於追崇考諸經
史之文尤重尊親之謚廼者下詔廷臣上定尊

謚衆心戴慕興議僉同

皇考尊謚聖神文武欽明啓運俊德成功統天大孝
高皇帝廟號

太祖

皇妣尊謚孝慈昭憲至仁文德承天順聖高皇后告
于

天地

宗社以六月十一日恭上冊寶於戲顯號鴻名永協
臣民之公論配

天享祀用伸人子之至情光華宇宙垂裕萬年布告
天下咸使聞知

永樂元年六月十二日

奉

天承運

皇帝詔曰立太子以尊

宗廟重社稷樹王國以廣藩輔隆本支非一家之私
爲天下之公夏商周漢唐宋之盛用此道也朕
皇考聖神文武欽明啓運俊德成功統天大孝高皇
帝

皇妣孝慈昭憲至仁文德承天順聖高皇后聖靈陟
降敷佑朕躬君臨大寶夙夜靡寧思惟賢德傳

皇明詔赦

敘維成繼續神明之統紀益爲

皇考妣之光華監官簡俾延歷於茲周王以宗室之
長屢表請立太子封建諸王宗室羣臣百姓合
辭累表謂朕長子足以嗣承

宗廟諸子皆足以夾輔邦家朕惟天下之通義詢衆
志之僉同乃於永樂二年四月初四日立長子
高熾爲皇太子授冊寶正位東宮第二子高煦
爲漢王第三子高燧爲趙王尚念宗親溥施恩
禮封楚王第五子孟煒爲崇陽王第六子孟燾

爲通山王第七子孟燦爲通城王第八子孟炤
爲景陵王第九子孟燿爲岳陽王蜀王第二子
悅燿爲華陽王第三子悅煒爲宗寧王第四子
悅忻爲崇慶王第五子悅熒爲保寧王代王長
子遜端爲代世子第二子遜岷爲廣靈王遼王
第二子貴恰爲長陽王第三子貴燮爲遠安王
第四子貴燧爲興山王第五子貴煊爲巴東王
第六子貴炖爲潛江王第七子貴燁爲宜都王
第八子貴忻爲松滋王寧王長子盤斌爲寧王

世子岷王長子徽煥爲岷王世子第二子徽燦
爲鎮南王谷王長子賦灼爲世子第二子賦煥
爲醴陽王韓王長子冲煥爲韓世子第二子冲
懋爲襄陵王第三子冲煥爲臨汾王秦王長子
志均爲秦世子晉王長子美圭爲晉世子於戲
治法前王統承列聖內外相維保

宗社萬年之福華夷同樂亘古今全盛之基布告天
下咸使聞知

永樂二年四月初四日

奉

天承運

皇帝詔曰朕聞帝王之道立愛惟親爲子不祇不及
於父朕

皇考聖神文武欽明啓運俊德成功統天大孝高皇
帝

皇妣孝慈昭憲至仁文德承天順聖高皇后咸有一
德克享天心創業垂統傳之萬世朕長兄懿文
皇太子降年弗永胤子允攸幼冲嗣立昏愚自

暴顛覆舊章崇信奸回戕害骨肉舉兵攻朕必
欲咸刈俾無噍類天下蕩然社稷幾墜朕惟

祖宗積德之勤

父皇母后創業艱難不得已而應兵賴

天地之祐內難肅清允攷罪惡貫盈闔官赴火諸王
臣民同辭勸進朕以

宗社爲重勉徇輿情君臨大寶長兄諸子允燾允燮
允燮仍錫王封不意允燾允燮弗知省躬自生
疑懟朕以長兄至情不忍譴責免爲庶人以保

全之朕痛切於懷常存念慮長兄未有承祀其
第四子允熾生有十三年矣器資端重改封旣
寧王世守懿文皇太子之祀於戲協和之道睦
族爲先惇敘之仁繼祀爲大展於同氣之情庶
盡親親之義布告天下咸使聞知

永樂三年三月二十七日

奉

天承運

皇帝詔曰朕惟

聖帝明王之於天下體

天地之心順萬物之宜以爲治朕荷

天命承

皇考鴻基卽位以承夙夜兢惕父母斯民之道惟恐
不至刑措之風未臻其效比見有犯法者心甚
憐之故屢勅法司以人命至重議讞審覆務先

寬大不事苛細毋使冤抑尚慮有司奉行不謹
致令良善罹于憲條雖欲改過其道無由今大
赦天下咸與惟新自永樂四年十二月初六日
昧爽以前除謀反大逆謀殺祖父母父母妻妾
殺夫奴婢殺主謀故殺人蠱毒魘魅毒藥殺人
強盜不宥外其餘已發覺未發覺已結正未結
正罪無大小咸赦除之敢有以赦前事相告言
者以其罪罪之於戲發政施仁用廣好生之德
改過遷善永同熙皞之風故茲詔示咸使聞知

一文武官吏軍民人等爲事充軍種田養馬
養羊買船遞送擺站爲民炒鐵煎鹽充當
膳夫軍伴軍匠及遷徙安置爲民并歷刑
充吏及軍人爲事調發別衛充軍等項已
到配所在途過程限者不動餘皆釋放若
有比先已到配所後又遇赦者仍發原配
所

一在禁釋放軍官并總小旗將軍力士人等
各復職役照舊支與俸糧官律該死罪者

與半俸

一見在各處立功拏賊軍官旗士人等若律該死罪應赦者各復職役官支與半俸旗士人等支與原糧其犯徒遷徙笞杖并議罪及照榜例者各復職役照舊關支俸糧俱就本處備禦有故爲事官旗名頭勾軍者亦復職役支與家小俸糧仍令勾軍完日回衛致仕官舍人餘丁疎放一釋放文職官并監生吏典人等律該死罪

應赦者官做爲事官月與米一石聽差監生吏典人等并照榜例及犯徒流以下罪與未議罪名者各復職役照舊支與俸糧已降者不動

一見在各處做辦事官爲事官辦事人名頭文職官員人等各復原職役仍照在彼辦事照辦事人例支與俸糧

一官吏軍民人等爲事起發戶部納米贖罪內有已納未完及全未納者釋放糧米免

追

一各色人匠犯罪在京准工及常川做工者
依舊輪班

一賊物係侵盜官物并遺失拖欠者追正賊
其餘賊私及追陪者免追

永樂四年十二月初六日

奉

天承運

皇帝詔曰朕祇奉

皇圖恪遵成憲弘敷至化期四海之康樂永保太和
俾萬物之咸遂夙夜兢業弗敢怠荒仰惟

皇考太祖高皇帝混一天下懷柔遠人安南國陳日
煚慕義嚮風率先職貢嘉其勤惓頒賜鴻恩封
爲安南王長有其土子孫世襲與國同休比者
其賊臣黎季犛子黎蒼久蓄虎狼之心竟爲吞

噬之舉殺其國王戕及閭宗覃被陪臣重罹其
慘掎尅殺戮毒痛生民鷄犬弗寧怨聲載路狐
疑狙狡猘黠狼貪詭易姓名爲胡一元子爲胡
空隱蔽其實矯稱陳甥誑言陳氏絕嗣請求紹
襲王封朕念國人無所統屬不逆其詐聽其所
云倖成奸譎之謀輒肆跳梁之志全無忌憚靡
慝不爲自以爲聖優於三皇德高於五帝以文
武爲不足法下周孔爲不足師毀孟子爲盜儒
謗程朱爲剽竊欺聖欺天無倫無禮僭國號曰

大虞竊紀年曰紹聖稱爲兩宮皇帝冒用朝廷
禮儀非惟恣橫於偏方實欲抗衡於中國佯奉
正朔受頒曆而棄之招納逋逃聞追索而隱匿
朝貢之禮不行兇暴之情益肆涵淹卵育薦有
圖大之心蜂蜩斧螳益肆侵陵之勢覬覦南治
窺伺廣西據思明府之數州侵寧遠州之七寨
劫朝廷之命吏供彼家之歲金虜其子女以備
髡鉗毆其人民以蹈湯火欺占城之孱立伐其
國遭喪奪其土疆要其貢賦逼受僞印冠服令

皇明詔赦

永樂五年

三

其從已背朝屢被殘殃數來告急朕矜其愚昧未終絕之特遣使臣曉以禍福啓其自新之路開其遷善之門諄切再三俾其改悟益頑狠愎怙惡弗悛未幾安南王孫奔竄來京訴陳其事黎賊一聞謬來効款求釋誣罔之罪迎立陳氏之孫示彼至公會何芥蒂卽遣送歸國黎賊乃伏兵要殺於途并殺朝使朕遣人賜占城禮物又殺使臣而奪之朝臣請加兵征討謂昔苗民逆命禹有徂征之師葛伯仇餉湯有徯蘇之旅

矧茲兇豎積惡如山四海之所不容神人之所
共怒此而可紆孰懲其戒朕以五兵戢釁之日
正萬國義安之時獨茲叛夷妄罹天憲蛇虺之
毒無厭生靈之害曷已興言及此盡然傷懷志
在吊民豈忍窮武寔不得已告于神祇聿興問
罪之師爰舉九伐之典用除殘暴以解倒懸撲
兇燄於方張興陳氏於旣絕乃命征夷將軍成
國公朱能等率偏師帶甲八十萬以討之特勅
將士其臨陣來敵者殺無赦其來降者悉宥之

師渡富良江賊率衆號七百萬來拒戰尚逞怒蛙之勇以嬰霆擊之威兵刃纔交勢卽披靡我師躡之如摧枯拉朽斬首數百萬級直擣東都遂平西都四郊無結草之固前徒有倒戈之師黎賊孽黨卽時殄滅其有投兵乞命者卽釋不誅所至秋毫無犯市不易肆人民按堵遍求陳氏子孫立之其國官吏耆老人等累稱爲黎賊滅盡無可繼承陳請安南本古交州爲中國郡縣淪汙夷習及茲有年今年幸遇汎掃攬搶剗

碣蕪穢復古郡縣與民更新庶再覩華夏之淳
風復見禮樂之盛治俯徇輿情從其所請置交
趾都指揮使司交趾承宣布政使司按察司及
軍民衙門設官分理廓清海徼之妖氛變革遐
邦之陋俗於戲威武載揚豈余心之所欲元惡
旣殛實有衆之同情廣施一視之仁永樂太平
之治布告中外咸使聞知

皇明詔赦

永樂五年三月初一日

奉

天承運

皇帝詔曰朕祇承

天命統紹鴻基安民之心不忘夙夕思昔奸臣謀危
宗社毒害親親奉藩于燕橫遭讒間禍機四發興兵
圍逼危迫朕躬實不得已用兵自赦誅討奸回
以平內難當時朕帥將士南征躬擐甲冑卧雪
眠霜間關行陣衝冒鋒鏑乘危轉逸萬死一生
諸將士與朕同甘苦勤勞尤甚時皇太子居守

北京賴軍民竭忠効力不避艱難供給軍需饋
運糧餉馳驅負輓晝夜不寧攻守戰鬪被堅執
銳冒犯矢石父母妻子不保朝夕甚爲勞苦使
朕無北顧之憂遂誅奸回定平禍亂莫安

宗社朕自卽位以來念爾將士人民飲食夢寐時刻
不忘其間民有効順始終不變者已嘗全免稅
糧以酬其勞比年之間北京所屬郡縣數被水
患歲穀不登民多缺食流移他所朕甚憫焉其
北京永樂四年五年所有該納稅糧馬草折收

米豆戶口食鹽價米諸色課程邇未納者盡行蠲免其諸色課程仍自永樂六年爲始除見收在官外免徵三年門攤課程三年免徵後革去增加之數只依舊額供辦於戲同濟艱難久念勤勞之績憫茲窮乏單敷寬恤之恩庶俾康寧少伸朕意故茲詔諭咸使聞知

永樂六年二月十八日

奉

天承運

皇帝詔曰成周營洛肇啓二都有虞勤民九重巡省
朕君臨天下祇率典彝統御之初已陞順天府
爲北京今四海清寧萬民安業國家無事省方
惟時將以明年二月巡幸北京命皇太子監國
朕所經過去處親王止離王城一程迎接軍民
衙門官吏人等於境內朝見非經過去處毋得
出境道路一切飲食供給之費皆已有備不煩

於民諸司毋得有所進獻科擾勞衆布告中外
咸使聞知

永樂六年八月十一日

奉

天承運

皇帝詔曰朕受

天命承

太祖高皇帝洪基統馭萬方撫輯庶類四夷僻遠靡
不從化獨北虜殘孽處于荒裔肆騁兇暴屢遣
使臣開諭輒拘留殺戮乃者其人犯邊邊將獲
之再遣使護送復見拘殺恩旣過背德豈可懷
況豺狼野心貪悍猾賊虐噬其衆引領猘蘇稽

於天道則其運已絕驗於人事則彼衆皆離朕
今親率六軍往征之大振武威用彰天討且朕
必勝之道有五以大擊小以順取逆以治攻亂
以逸伐勞以悅吊怨鮮不殄絕蕩除有罪掃清
沙漠撫綏顛連則疆場乂安人民無轉輸之苦
將士無飢寒戰鬪之虞可以解甲高枕一勞久
逸暫費永寧也布告中外咸使聞知

永樂八年二月初四日

奉

天承運

皇帝詔曰自元祚旣終四海鼎沸

天命我

太祖高皇帝統一華夏普天率土靡不臣妾惟胡寇
遺孽奔竄沙漠詘竄偷生殺戮易置有如反掌
朕承大統撫治寰區志在安民惟懷不及盡心
殫慮以求其寧凡居履燾之中舉納甄陶之內
獨此殘胡騁兇梗化屢使撫循輒見拘殺往者

邊將擒其部屬念其各有父母妻子盡釋還鄉
遣使送之彼僕性不移復殺信使積慝恣虐益
肆寇攘怨怒神人實天所殛遇虐之旅以慰後
蘇遂親率六軍往征之用拯顛逆綏寧降附五
月十三日師至幹難河遇胡寇本雅失理來戰
卽摧敗之追奔逐北電掃霆驅本雅失理奔命
不暇以七騎奔遁獲馬駝牛羊生口無算其餘
款附者相繼而至遂撫安之給其羊馬糧廩令
各安生業數百種之拊芽一旦蕩除千萬里之

腥羶由茲洒滌乃封于山川振旅班師於戲包
舉無外弘施一視之仁撫輯有方永樂萬年之
治布告中外咸使聞之

永樂八年五月二十日

奉

天承運

皇帝詔曰朕祇膺

天命統馭萬方卽位以來軫念黎庶夙夜惓切眷惟
陝西接境邊塞供給轉運民用勤勞矧自今年
夏秋以來疫癘相仍民滋困悴未臻蘇息朕甚
憫焉其陝西所屬府州縣永樂八年以前拖欠
稅糧並與蠲免故茲詔示咸使聞知

永樂九年十一月初一日

皇帝勅諭天下文武大小官員人等以今二月巡狩
北京命皇太子監國經過去處親王止離城一
程迎接軍民衙門官吏人等於境內朝見非經
過去處毋得出境道路一切飲食供給之費皆
已有備不煩於民諸司毋得有所進獻科擾勞
民故諭

永樂十一年正月初二日

奉

天承運

皇帝詔曰朕祇奉

天命撫馭華夷惟欲乂安咸得其所瓦剌黠虜僻處
窮荒與其醜類歲在讐殺敗亡喪沒存者無幾
朕卽位之初撫摩存恤授以封爵數年以來憑
仗朝廷始得休息烏合爲羣卽復驕恣辜德負
恩背違信義擅自弑立執殺使臣侵擾邊境天
不封狼貪欲無厭覬覦自大朕不得已躬率六

軍以討之師至撒里怯兒之地賊兵來迎戰一
鼓而敗之追至土刺河賊首荅里巴馬哈木太
平把禿孛羅不度智能掃境而來兵刃纔交如
摧枯振朽追奔逐北獸獮禽戮殺其名王以下
數千人斬馘無算餘虜宵遁遂班師而還歸至
飲馬河和寧王阿魯台遣其酋長率衆詣軍門
來朝推誠待納以安反側勞徠撫輯令回部落
於戲奉行天罰掃腥羶於絕塞綏寧附順覃恩
澤於遠人俾中國靡轉輸之勞邊場無烽埃之

警故茲詔示咸使聞知

永樂十二年六月二十八日

皇帝勅論文武羣臣欽天監奏老人星見於丙位其
色黃赤而大光明潤澤應人王壽昌天下治平
朕仰荷

太祖高皇帝膺受

天命掃除羣雄平定禍亂創業垂統立綱陳紀制禮
作樂安天下生民於衽席之上積德累仁茂延
嘉慶致此太平是以

上天垂象屢顯鴻應兆天下臣民同臻仁壽之域揆
朕才德涼薄曷以臻茲朕惟

八

天垂嘉徵能戒則有慶否則雖休不休凡爲臣民誠能謹飭遵守

太祖高皇帝成憲爲子者盡孝爲臣者盡忠奉公守法安分守已則永膺福佑共享太平若不能遵守法度恣肆非爲不忠不孝則

天災人禍立至爾文武臣僚各盡乃心以輔朕之不逮國家有萬年之安爾等子子孫孫同享萬年之福今壽星之應其勿賀故諭

永樂十四年九月初一日

皇帝勅論文武羣臣卿等以壽星見於南郊謂朕德
所致請上表稱賀朕揆才德涼薄負荷弗堪何
足以當之然朕之所願者時和歲豐天下老少
俱得其所賢人在位讒慝不作百工舉任其事
無有廢弛使政平訟理國家清明者此爲瑞也
夫

天命靡常惟親有德否則不足以膺

天眷今壽星見其勿賀卿等但勉修厥職一德一心
以輔朕之不逮庶幾上答

天休以享福祿尚慎之哉

永樂十五年八月十七日

皇帝勅諭文武羣臣卿等以壽星見于丙位應人主
壽昌天下治平請上表稱賀朕惟

上天垂象以親有德朕揆才德涼薄夙夜兢惕恐負
荷不堪今壽星見正當修德以答

天休其勿賀卿等但相與勉修厥職以輔朕不逮庶
稱朕奉

天勤民之意故諭

永樂十六年八月十三日

奉

天承運

皇帝詔曰開基創業興王之本爲先繼體守成經國之宜尤重昔朕

皇考太祖高皇帝受天明命君主華夷創立江左以肇邦基肆朕續承大統恢弘鴻業惟懷永圖眷茲北京實爲都會地勢雄偉山川鞏固四方萬國道理適均惟天意之所屬實卜筮之攸同乃倣古制徇輿情立兩京置

皇明詩苑
郊社

宗廟創建宮室上以紹

皇考太祖高皇帝之先志下以開子孫萬世之弘規
且於巡狩駐守實有便焉爰自營建以來天下
軍民樂於趨事天人協贊景貺駢臻今工已告
成選以永樂十九年正月朔旦御奉天殿朝百
官誕新治理用致雍熙於戲

天地清寧衍

宗社萬年之福華夷綏靖隆古今全盛之基故茲詔

皇帝勅論文武羣臣

朕聞爲君難爲臣不易創業難守成不易剛柔寬猛
適其中禮樂刑政有其序唐虞三代至漢唐宋
率由斯道是故舜清問下民報虐以威誅四凶
聖讒說明五刑然後無爲恭已南面神禹承之
無間可議夏桀之亂民從其暴成湯之興兼弱
攻昧取亂侮亡肇修人紀用革愆淫旣奠四方
子孫承之惟監成憲殷紂之亂商俗靡靡周公
相武王誅紂伐奄遷殷頑民滅國五十繼相成

王制禮作樂垂拱仰成刑措不用漢承秦大亂
之後高祖令蕭何定律令韓信申軍法張蒼定
章程法令嚴明惠帝清淨至於文景挾書之律
肉刑之慘一切除之務行寬厚唐承隋末諂諛
汰侈暴慢成風高祖定官制頒律令立租庸調
法汰僧道勳臣犯法無所假貸太宗貞觀之後
懲斬趾禁鞭背刪定律令變爲輕典力行仁義
幾置刑措宋興承五季之亂太祖太宗頗用重
刑以繩姦慝躬自折獄務抵明慎立法之制嚴

示咸使聞知

永樂十八年十一月初四

而用刑之情恕咸平以後刪其繁刑益務寬仁
子孫承之含弘光大恭儉純誠未嘗殺一不辜
天下歸仁化成俗美此歷世守成創業之事剛
柔寬猛之中禮樂刑政之序莫不皆然蓋敦禮
樂用寬柔譬之膏粱以養生用剛嚴任刑罰譬
之藥石以伐病膏粱伐病祇益其病藥石養生
必至傷生時措之宜不可紊也朕

皇考太祖皇帝天錫大聖之資以當非常之變奮自
布衣撥亂反正力舉一世而甄陶之比之三代

漢唐宋創業之時又有大相遠者蓋中華禮樂之區悉爲左袵之俗沉浸百年洗滌不易陵夷已甚振舉尤難風俗之染污非但若桀之悞淫也姦雄之睥睨反側非但若紂之頑民也服古人之所未易服齊古人之所不能齊兢兢業業勞心焦思求賢如不及從諫如轉丸晝夜圖惟經權應變不得已而用刑特權時之宜耳及其立爲典常先議定律損益更改十年乃成頒行天下以爲民之禁復爲祖訓傳之子孫宣布條

章垂憲萬世墨劓刑官並禁不用欽恤之意已
著于象刑權時之宜不定爲常法律令之禁不
易禮樂之用彌彰朕遵成憲佩服

聖謨思守成之不易念刑措之尤難昔者唐虞三代
君臣之間責難訓迪紀於詩書今朕告教爾文
武羣臣惟審聽之夫職曰天職民曰天民工曰
天工祿曰天祿皆非朕之私惟爾羣臣相朕以
章天命以奉天討以亮天工保茲天命以享天
祿善惡吉凶實爲影響可不敬哉爾惟効職勿

謂忠爲有餘爾惟盡心勿以勞而自伐爲名爲善善必不誠計利而動動必終息且計利害者必獲害患得失者終於失故廉不怨貧以廉爲行之常勤不羨逸以勤爲分之宜事有繁簡各安其所遇位有崇卑常順其所處爾羣臣所當知也勿爲朋比朋比必至於淪胥勿縱利口利口必至於傾覆勿爲姦欺姦欺必至於暴露勿爲怙終怙終必至於殄絕依阿施祿位者昧理擅權作威福者逆天貪污恣情欲者速戾譏說

殄行以惑人心者自刑爾羣臣所當戒也矧夫
刑者輔治之具自古聖帝明王及朕

皇考所慎重而不苟不得已而用之者也輕重毫釐
之門禍福生死之決死者不可復生斷者不可
復續故刑期無刑而殺以止殺殺一夫而天下
服釋一人而天下悅至於使人無犯可也爾或
無誠臨民治獄恬不加意甚至信讒而執偏言
深文以誣良善納賂以亂是非作威而眩曲直
自作聰明發摘瑕類法外求情致人於死鬼神

所鑑甚可畏也朕爲此懼由慰日勤審克之際
罪疑惟輕乃有懷殘忍之私欲遵酷吏之軌謗
朝廷之寬搖撼上下之心所謂利口必至於傾
覆者爾惟戒哉聖人用人不求其備誠以才能
有高下智識有淺深事皆盡善上智所難動靜
云爲豈能無誤朕惟念此每加寬容乃有恃茲
屢造非彝常懷倖免不知忽微之過豈可積多
非分之恩豈可常得所謂怙終必至殄絕者爾
惟戒哉亦有柔姦隱慝厚貌深衷夤緣攀結請

託行私僥倖圖回附下罔上不感天子而惟感
權臣寧負公門而不負私室同惡相濟同勢相
保同邪以惡正直同讒以陷忠良同爲姦宄以
慝其非同幻譎張以護其短同側媚以相師同
諂諛以相悅所謂朋比姦欺必至淪胥暴露者
爾惟戒哉亦有謬而執法賣直沽恩謗人惑衆
起愴言以眩聽滅公議以濟私所謂讒說殄行
唐虞所聖者爾惟戒哉亦有愧赧于中自懷疑
貳本無勞績妄自驕矜居寵弗畏任情納賂因

人毀譽縱已喜怒殺生予奪陰狠自專所謂擅
權作威福貪污縱情欲者爾惟戒哉旅進旅退
從違之間候朕顏色圖進諂諛甘言遜嗣無所
建明尤朕所惡所謂依阿尸祿位者昧理亦恐
獲戾於天爾惟戒哉於戲興禮樂以致太平朕
守成之所當務適寬嚴以輔政教爾羣臣之所
當知故將勉於爲善尤必戒於作非夫忠臣爲
國至於亡身鄙夫事君但知利已朝廷機務取
給目前生民休戚畧不加意憤事蔽賢偷安玩

日苟且文書恃爲塞責甚至微勞未報自負如山巖譴或加中懷謫怨是皆不共爲臣職豈能共至於雍熙故以寬而濟嚴必以勤而居逸聖帝明王古今一道朕務宵衣旰食豈爲惡逸好勞畏

上帝之監臨守

皇考之基業實資爾羣臣爲德爲民有猷有守輔成治化上答

天明廸朕之戒時乃之休至於刑罰尤悉乃心攷之

於書屢致其意誠以民命至重鬼神難欺譬之
操刀而割肉尚有血指之虞當食而言或致吻
傷之失事雖切已未免過違心有存視而不
見毫釐之差死生之決一往不復雖悔可追吉
凶之應詎止一身殃慶之流及於後世可不戒
哉可不慎哉朕嘗昧昧思之不自知其辭之復
也爾體朕心無怠於心必欽必慎惟明惟恤俾
寬不至於縱嚴不至於殘圉圉空虛刑指不用
政教修舉禮備樂和國有萬年之安爾亦有無

窮之譽子孫黎民尚亦有慶戒之勉之朕言不
貳罔俾唐虞專美前世欽哉故諭

永樂 年 月 日

奉

天承運

皇帝詔曰朕荷

天地

祖宗眷祐繼承大統撫馭萬方夙夜祇勤率遵成憲

乃者紹

皇考太祖高皇帝之志効成周卜洛之規建立兩京
爲子孫帝王萬世之基爰自經營以來賴天下
臣民殫竭心力涉寒暑冒風霜趨事赴工勤勞

匪懈朕心眷念拳切不忘今官殿告成朕已御
正朝祇祀

天地

宗廟社稷懋圖治理嘉與維新重懷寬恤之仁用廣
好生之德大赦天下自永樂十九年正月十五
日昧爽以前除謀反大逆謀殺祖父母父母妻
妾殺夫奴婢殺主謀故殺人蠱毒魘魅毒藥殺
人強盜不赦外其餘已發覺未發覺已結正未
結正罪無大小咸赦除之敢有以赦前事相告

言者以其罪罪之所有事宜條列于後

一文武官吏軍民人等有爲事做工運磚拖石等項者悉宥其罪官吏復還職役軍還原伍匠仍當匠民放寧家

一軍官并旗軍將軍力士校尉舍人餘丁爲事犯罪未經斷決發遣各處立功及哨瞭等項者盡行宥免復還職役仍前立功已發充軍者不在此例

一文武官員并總小旗有爲事已復職役任

支俸糧并支半俸者俱照舊關支

一遞年虧欠倒死等項馬駝騾驢牛羊等畜
及拖欠蘆柴未納各項贓罰并虧折等項
追陪未完顏料一應物件盡行蠲免其陪
追一應物件止追該納正數陪追者蠲免
一軍民該納柴炭自永樂十六年以前拖欠
未納者悉皆蠲免

一遞年拖欠虧欠未完稅糧農桑及諸色課
程草束等項經該官吏人等赦宥其罪仍

令照數納足

一逃軍逃匠許令赴官首告與免本罪軍還原伍匠仍當匠

一失班罰工人匠及鎖錄終身做工者盡行釋放仍舊輪班

一各處逃移人戶悉宥其罪許於所在官司首告發回原籍復業其戶下虧欠稅糧盡行蠲免

一各處見監收及起取未到尼姑道姑宥免

其罪各放寧家還俗

一凡有軍民利病及貪官污吏作弊害民仍前不改者許諸人具實奏聞以除民害

一各處造作除軍需等項急用外其餘不急之務暫且停止

一今後諸司所行事務悉遵舊制不許更改敢有更改變亂成法者治以重罪

一民間有懷才抱德堪爲任用者許諸人奏舉量才擢用不許徇私濫舉

一鰥寡孤獨及篤廢殘疾者有司依例存恤
毋令失所其民年八十以上者有司給與
絹二疋布二疋酒一斗肉十斤時加存問
於戲華夷一統覃敷曠蕩之恩海宇清寧永樂
太平之治故茲詔示咸使聞知

永樂十九年正月十五日

奉

天承運

皇帝詔曰朕恭膺

天命統馭華夷夙夜祇承罔敢忽怠比者遵倣古制
肇建兩京惟在安民永隆基業乃永樂十九年
四月初八日奉天殿災朕爲此懼莫究所由此
朕不德之所致歟抑任用匪人毒痛天下而致
此歟今特詔告天下凡有殃於吾民及不急之
務悉皆停止用蘇困弊以答天心所有事宜條

列于後

一各處永樂十七年以前拖欠稅糧課程鹽課馬草等項及永樂十八年被災田地糧草悉皆蠲免

一各處納欠各項銅鐵顏料席麻木殖等物及倒死虧欠各項頭疋一應倉糧鹽課等項并廣東追陪珍珠悉皆蠲免

一各處開辦金銀課除已煎銷見收在官外其餘暫行停止敢有不遵法度私自煎銷

者治以重罪舊額歲辦課銀并差發金不在此例

一各處買辦一應物料除軍需急用外其餘不急之務暫行停止敢有指此爲由仍復科歛害民者治罪不饒

一陝西四川僭運茶課暫且停止其有已起運者仍令運赴所指茶馬司交收

一各處抄造及買辦紙劄暫行停止

一但是買辦下番一應物件并鑄造銅錢買

辦麝香生銅荒絲等物暫行停止

一往諸番國寶船及迤西迤北等處買馬等
項暫行停止

一被水旱缺食貧民有司取勘賑濟

一逃移人戶招回復業優免雜泛差役一年

仍將本戶下遞年拖欠稅糧等項蠲免

一法司所問囚人今後亦依大明律問罪不
許深文妄引榜文條例

一軍官有犯笞杖徒流遷徙雜犯死罪有降

職及發遣各處充軍并充軍立功哨瞭等項者俱復還原職令回原衛

一官吏人等但因營造買辦物料及失悞違限等項得買者悉皆宥免官吏人等各還職役

一營造軍夫人匠但有傷故者有司好生撫恤其家免其雜泛差役

一諸司官吏及差使人員貪賊害法故將平民苦虐者許所在按察司及巡按監察御

皇明詔赦

二八

卷一百一十五

三

史就便擒拿赴京連家小發邊遠充軍

一諸司吏卒弓兵皂隸牢子多有久戀衙門
連年不替專一浸潤官長起滅詞訟說事
過錢虐害良善者許所在按察司及巡按
監察御史就便擒拿問罪連家小發邊遠
充軍

一自今官吏敢有不遵舊制指以催辦爲由
輒自下鄉科歛害民者許里老其實赴京
面奏處以重罪

一各處擺站囚人有年限滿者卽令法司撥替疎放寧家

一北京太僕寺并各衛見養孳生馬疋今後有虧欠馬駒者照例追鈔

一修造往諸番船隻暫行停止毋得重勞軍民

一今後五府六部等衙門差人出外幹辦公事務要辯驗有精微印信勘合方許奉行若無精微印信勘合卽係詐僞所在官司

皇明詔赦

永樂十九年

就便擒拿赴京

於戲奉天法

祖敢忘修省之誠布德覃恩用舉寬仁之政故茲詔
示咸使聞知

永樂十九年四月十三日

奉

天承運

皇帝詔曰

天地之大覆載而無外

帝王之治一視而同仁朕恭膺

天命主宰華夷夙夜勤勞勉圖治理無非使天下生

靈咸得其所而已往者醜虜阿魯台窮居漠北

鼠穴偷生屢爲瓦剌困逼妻子不保遂率其部落來歸朕念其遑遑無依特加優恤授以封爵

皇明詔赦

二

永樂二十年

三

三

令其仍居本土安生樂業永享太平豈意北虜
心懷譎詐僭妄驕矜違天逆命負德辜恩殺戮
信使侵犯邊境恣肆慘酷毒痛生靈朕以保愛
天下軍民躬率六師往討之以七月十四日師
抵濶藥海之北其醜虜阿魯台聞風震懾棄其
車輛牛羊馬疋逃命遠遁躬追累日獲其謀者
云醜虜阿魯台自知負德辜恩驚悸失措致病
疴羸爲天地神鬼所殛餘孽潰散朕乃移兵勦
捕其惡黨兀良答之寇東行至屈裂兒河逼寇

迎敵朕親率前鋒摧敗之直抵其巢穴殺賊首
數十人斬馘其餘黨無算獲其部落人口焚其
車輛兵器盡收其馬疋牛羊綏撫降附振旅班
師嗚呼聲罪致討用伸九伐之威殄寇安民永
樂萬年之治布告中外咸使聞知

永樂二十年八月十七日

奉

天承運

皇帝詔曰朕恭膺

天命統承

皇考太祖高皇帝鴻業夙夜究治惟懷永圖北以天
虜殘孽辜恩負德梗化弗廷乃以今夏四月四
日躬御六師往討之師駐應昌前鋒獲虜聲息
詢悉孽虜去秋探知大軍出塞卽挾妻子遠竄
山谷圖保殘喘至冬又爲天地鬼神所譴雨雪

連綿積深尋丈其牛羊驢馬亡斃殆盡種落叛
散互相劫奪及今又聞大軍之出日夜奔遁深
入漠北窮感困迫莫克自知朕以爲此寇譎詐
未可深信徑進兵至答簡納木兒河窮搜極索
直抵白邛山四望蕭條曠無人跡遂移師東行
踰屈裂兒河復涉溥溫河擣賊孽黨閱其巢穴
悉已傾蕩耕牧之地盡爲荒墟是用班師還京
於戲征伐國之重事昔高宗之伐鬼方周宣之
逐玁狁豈其得已哉然皆爲保庇生靈規國遠

圖是以徂征之師不容不舉今妖氣汎掃沙漠
肅清豈惟朕之威力所及實賴

宗社之靈

天心眷佑永貽四海蒼生無窮之福故茲詔示咸使
聞知

永樂二十一年七月十五日

皇帝敕諭長子皇太子高熾文武羣臣比以壽星見
文武百官上表稱賀以爲

上天垂象顯示嘉禎豈惟朕德所致實

皇考太祖高皇帝積德累仁神功陰騭並福生靈

天地神明鑒悅默佑顯相之所致也朕仰思

太祖高皇帝開創之艱夙夜兢惕勉圖治理惟求所

以昭答

天心以膺負荷之重尚冀

宗廟

社稷之託天下生靈

天命可畏繼序匪輕若爲子者能盡其爲子之職爲
臣者能盡其爲臣之道親賢遠佞旌別淑慝無
以利口亂政事無以巧詐飾虛文恪勤治理罔
敢荒逸雖無祥瑞而

上天昭鑒

祖宗慰悅錫佑垂慶自足以致國祚之悠久苟爲子
者不能盡子職爲臣者不能盡臣道蓄險邪之
心懷忿恨之志以利口而亂政事以巧詐而飾

虛文是非莫別賢否莫知怠政廢事蠹國殃民
雖有龍馬神龜鳳凰騶虞白象醴泉甘露景星
慶雲嘉禾芝草連理白雉之異亦何足爲瑞往
者瑞光屢見而言者皆以爲虛誑茲復壽星見
上表稱賀實與曩者之言相違豈其實心誠意
哉不過應故事飾虛文耳所進之表朕不敢當
時用繳還及以敕諭爾等尚且洗心滌慮盡忠
盡孝務篤誠敬懋修厥職以慰

天心以副朕望俾時歲和豐家給人足子孝臣忠四

海內外咸樂太平此卽國家上瑞也爾等其敬
慎之勿忽故諭

永樂二十一年九月十二日

奉

天承運

皇帝詔曰朕惟

天地覆載以生育爲德帝王統馭以安養爲心順者
撫之逆者摧之所以示無外而一天下也且夷
狄爲患其來已久書曰蠻夷猾夏詩稱戎狄是
膺歷漢及唐屢被侵侮至於有宋其禍尤甚是
以腥穢上聞

天生我

皇考太祖高皇帝受天明命主宰生靈削平禍亂掃蕩腥膻以開萬萬年太平之盛治

聖德神功自開闢以來未之有也肆朕躬膺

天命紹承大統夙夜圖治惟在安民最爾醜虜尚敢偷生草野鼠竊邊疆已嘗躬率六師往平之芟除惡類撫輯善良令其仍居本土以遂其生不意其違天背德叛服無常復來犯我邊疆乃以今秋七月二十四日朕躬御戎服親率將士出塞以討之乃命寧陽侯陳懋爲前鋒以攻其西

朕兵抵陰山之脊適虜中僞知院阿失鐵木兒
等率妻子來降備言虜寇爲瓦剌順寧王脫歡
等勦戮餘孽奔潰逃命無所未幾前鋒寧陽侯
陳懋又得其名王也先土干率部落及其家屬
馬驢牛羊以數萬計遠來降附然也先土干驕
悍勇猛乃胡虜中之最狡黠者虜共畏服今旣
稽首軍門敷陳誠悃以爲天命在朕不敢違越
敬率部落上順天道親來朝見眷茲忠誠宜加
撫勞特封爲忠勇王以表其來歸之心是用班

師還京於戲安夏攘夷荆致雍熙之治綏降撫
順廣推一視之仁詔告中外咸使聞知

永樂二十一年十月十三日

奉

天承運

皇帝詔曰朕惟

上天生民爰立君王仁育兆庶咸底於泰和統御華

夷同躋於熙皞我

先皇帝奉

天撫運治化高於百王文德武功聲教被於四海比
緣邊警厓龍御以親征逮及凱旋竟鼎湖之升

逝

遺命神器付予眇躬顧哀疚之方深豈遵承之遽
忍宗親公侯駙馬伯文武臣僚軍民耆老及四
夷

朝貢之使俯伏

闕下奉表勸進以爲天位不可以久虛生民不可
以無主長嫡承統國家常經陳詞再三瀝懇勤
切用是仰遵

遺命俯徇輿情已於八月十五日祇告

天地

宗廟

社稷卽皇帝位奉

祖考之洪佑仰

聖神之永圖屬茲涖阼之初宣布維新之命其以明年爲洪熙元年所有合行事宜條示于后

一自永樂二十二年八月十五日昧爽以前官吏軍民人等有犯除謀反大逆子孫謀殺祖父母父母妻妾殺夫奴婢殺主不赦外其餘已發覺未發覺已結正未結正罪

無大小咸赦除之敢有以赦前事相告言者以其罪罪之

一軍官并旗軍將軍力士校尉舍人餘下人等爲事犯罪發遣各處立功嘹哨等項盡行宥免復還職役

一軍官有爲事被刑及罷閒者除謀逆外其餘見在者復其原職已故者子孫依例承襲總小旗革役充軍者各還其原役

一文武官吏軍民匠作人等有爲事做工及

運磚拖石砌城運糧等項者悉宥其罪官
吏復還職役軍還原伍匠仍當匠民放寧
家其風憲官有犯賊罪者不復其職放回
原籍爲民當差

一文武官員并總小旗有爲事已復職役住
支俸糧及支半俸者俱照舊支

一永樂十九年十二月終已前拖欠虧欠未
完稅糧料豆戶口鹽糧及有報數在官未
曾送納者盡行蠲免永樂二十二年戶口

鹽糧一年其各處拖欠草束及柴炭俱自
永樂二十年十二月終以前盡行蠲免

一自永樂二十二年八月十五日以前遞年
虧欠農桑諸色課程倉糧鹽課魚課等項
并倒死馬駝驢騾牛羊虧欠孳牲等畜及
拖欠蘆柴各處納欠銅鐵顏料席麻竹木
等項并追陪珍珠等物未納各項贓罰陪
追未完段疋等件盡行蠲免。

一軍官爲事犯罪發遣各處充軍養馬種田

等項者盡行宥免復職

一各處軍民有爲事追陪孥生馬疋受官府逼迫不得已將男女妻妾典賣與人以致流離困苦莫能自存者詔書到日官司卽爲贖還毋得托故延緩如女子年長已成婚者不在此例今後倒死孥生馬疋只照洪武年間追陪

一天下一應稅課照依永樂二十年以前舊額徵收不許指以鈔法爲由妄自增添擾

害商民違者罪之

一各處逃移人戶悉宥其罪許於所在官司
首告發回原籍復業免其差徭二年其戶
下虧欠稅糧盡蠲免

一下西洋諸番等國寶船悉皆停止如已在
福建太倉等處安泊者俱回南京將帶去
貨物仍於內府該庫交收諸番國有進貢
使臣當回去者只量撥人船護送其去但
係所差內外官員即便回京民稍人等各

放寧家

一往迤西撒馬兒罕失刺思等處買馬等項
及哈密取馬者悉皆停止將去給賜段疋
磁器等件就於所在官司明白照數入庫
馬駝騾疋若係官給者仍交還官軍民買
辦者仍給還原買之人所有差去內外官
員俱限十日以裏起程赴京不許托故稽
留

一往雲南木邦緬甸麓川車里等處採取寶

石等項及收買馬疋等件者悉皆停罷其
給賜之物發與差來進貢使人順帶回去
但係朝廷差去內外官員限十日以裏卽
便起程赴京官軍各回原衛着役不許稽
留

一各處修造往諸番船隻悉皆停止其各處
採辦鐵梨木只照依洪武年間例採辦餘
悉停罷

一但是買辦下番一應物件并鑄造銅錢買

辦麝香生銅荒絲等物除見買在官者卽
於所在官司庫交收若未起運者悉皆停
止

一各處買辦諸色紵絲紗羅段疋寶石等項
及一應物料顏料并蘇杭等處續造段疋
抄造紙劄燒造磁器採辦梨木板及造諸
品海味果子等項悉皆停罷其差去人員
卽便回京敢有指此爲由科歛害民者罪
之

一各處開辦金銀課除已煎銷見收在官外
自今并前停止敢有不遵法度私自煎銷
者罪之所差去開辦人員限十日以內卽
便赴京不許托故稽留但係舊額歲辦課
銀并差發金銀不在此例

一交趾採金採珠及採辦香貨之類悉皆停
止凡交趾一應買辦採取物件其詔書內
該載未盡者亦皆停止所差去內外監督
官員限十日以裏起程赴京並不許托故

稽留虐害軍民

一各處自爲營造採辦木植如已起運者隨到所在堆垛其未採辦者悉皆停止軍民各放寧家所差去採辦官員人等限十日以裏卽便起程赴京毋得托故稽留違者罪之

一浙江福建官臺山烏峰洞等處有等人民因被府縣及閘辦官吏逼迫不得已逃命山林出沒爲盜詔書至日悉宥其罪各還

原籍安生樂業永爲良民

一陝西四川僭運茶課有已起運者卽赴所指茶馬司交收未起運者悉皆停止

一各處造作除軍需外其餘不急之務盡皆停罷今後有司非奉朝廷明文敢有一毫擅自科擾軍民者罪之

一逃軍逃囚逃匠人等詔書到日爲始許一月內赴官自首免其本罪軍還原伍民還原籍匠復本業

一遞年爲事發去買馬當站及充遞運驛夫
皂隸膳夫軍伴之類法司卽便撥替放回
爲民不許延緩違者罪之

一有被水旱缺食貧民有司卽便取勘賑濟
一民間應有事故人戶拋荒田土有司卽爲
從實取勘開報以憑覈實除豁另行召人
承佃中間如係官田卽照民田例起科
一軍中有鰥寡孤獨者所司依例存恤毋令
失所民年七十以上及篤廢殘疾者許令

一丁侍養不能自存者官爲賑給凡軍民
年八十以上者所司給與絹二疋綿二斤
米一斗肉十斤時加存恤

一孝子順孫義夫節婦許所司保勘明白開
具實跡奏聞以憑旌表

一軍民之中有懷材抱德堪爲任用或屈下
僚或隱於山林所司薦舉以禮遣送赴京
量材擢用

一凡有軍民利病諸人直言無隱

一凡有貪官污吏蠹政壞法作弊害民詔書到後不卽改悔仍前貪虐者許巡按監察御史按察司卽便拿問解京

一自後官吏敢有指以催辦爲由輒自下鄉科歛擾害平民者許諸人首告所司卽便拿問解京

一諸司官員敢有容隱吏卒弓兵皂隸牢子久占衙門遞年不替專浸潤官長起滅詞訟說事過錢及稱主文等項名色各衙門

結攬玩法把持官府虐害良善許諸人首
告其有在按察司及巡按監察御史即便
擒拿問罪解京

一法司所問囚犯今後一依大明律科斷不
許深文違者罪之

於戲軍民一體愛人必務於寬弘賞罰有經爲
國必彰於名信尚賴文武賢卿中外良臣據乃
忠貞匡輔不逮用承鴻業隆國家永遠之基嘉
惠羣黎廣海宇治平之福敷告天下咸使聞知

永樂二十二年八月十五日

奉

天承運

皇帝詔曰朕惟自古聖君哲后有大功大德者必有
顯號徽稱以表揚鴻美垂萬萬年欽惟

皇考大行皇帝躬膺

天命統御兆民制治保邦隆繼述之大孝篤近舉遠
同覆載之至仁神武弘廓清之功聖文廣緝熙
之化

天地

皇明詔制

二〇〇 永樂二十二年

金

宗社享於上華夷蠻貊戴於下與圖克拓曠古所無
泰和融液嘉徵畢至海宇乂寧臻于熙皞欽惟
皇妣仁孝皇后德稟九聖上配宸巖至順以承天厚
德以載物含弘光大端一誠莊隆化理之原篤
宗祧之敬宣昭懿範母儀天下神遊益遠哀慕無窮
屬茲繼敘之初式舉遵崇之典謹命文武羣臣
稽古禮文議薦諡號大公之義輿論僉同祇告

天地

宗廟

社稷恭上

皇考大行皇帝尊諡體天弘道高明廣運聖武神功
純仁至孝文皇帝廟號

太宗

皇妣仁孝皇后尊諡仁孝慈懿誠明莊獻配天齊聖
文皇后於戲惟神聖配乾坤蓋名言之莫罄惟
光華同日月著尊仰於不忘敷告臣民咸使聞
知

永樂二十二年九月初十日

奉

天承運

皇帝詔曰朕惟致理必先正內所以崇王化之基承
統必重建儲所以厚國家之本迺若衆建宗室
式以永壯藩維帝王大經典章斯在朕祇承天
敘君主萬邦傾茲臨御之初方布維新之治念
德澤之未究竟夙夜之靡寧而親王勳臣文武
百辟志存愛國咸懷永圖屢表摠誠請立皇后
建皇太子稽率舊章勉徇衆志已於十月初八

日冊立妃張氏爲皇后十一月立嫡長子瞻基
爲皇太子封次子瞻垓爲鄭王瞻墉爲越王瞻
堦爲襄王瞻埏爲荆王瞻塙爲淮王瞻埜爲滕
王瞻垺爲梁王瞻埏爲衛王漢王嫡子瞻坦爲
漢世子次子瞻奎爲濟陽王瞻域爲臨淄王瞻
垺爲昌樂王瞻垺爲淄川王瞻垺爲齊東王瞻
垺爲任城王瞻垺爲海豐王瞻垺爲新泰王趙
王長子瞻垺爲趙世子次子瞻垺爲安陽王命
秦隱王庶長子志均襲封秦王楚昭王世子孟

炆襲封楚王蜀獻王嫡孫友埈襲封蜀王肅莊
王庶長子瞻煥襲封肅王遜簡王世子貴燠襲
封遼王厲王庶長子順煥襲封伊王封蜀獻王
之子悅煥爲永川王孫友埈爲黔江王友壘爲
羅江王代王之子遜炆爲潞城王遜堪爲山陰
王遜壇爲襄垣王遜炗爲靈丘王遜簡王之子
貴煥爲益陽王貴煥爲湘陰王貴燠爲衡陽王
韓憲王之子冲焚爲樂平王藩王之子佶煒爲
武鄉王佶煥爲陵川王佶煥爲平遙王於戲悖

敘彝倫自家邦以達乎天下鞏固

宗社隆本支以傳於萬年用弘仁厚之風永協雍熙
之化布告天下咸使聞知

永樂二十二年十月十八日

奉

天承運

皇帝詔曰朕以眇躬托于億兆之上天下治亂實係
於朕恩德不類罔敢怠荒兢兢業業日慎一日
兩紀于今矣然繇頃者任用輔相委寄過隆顓
權生事以紛亂我祖宗之成憲兼以所在牧守
撫字無狀以故澤靡下究情不上通事旣壅塞
人懷疑阻遂致賊盜相挺以興蓋自兩河兩淮
而西接于閩陝荆湖二江二浙而南底于閩粵

嶺海大憖小醜寢繁有徒戕殘我人民蹂躪我疆土甚者竊據城邑僭稱號名兵連累年怨氣凝結生靈塗炭間井丘墟國家百年亭育之功一旦蕩然興言及此深用愧悼靖思厥咎罪實在朕念茲庶民皆我赤子朕既不德不能盡君人之責使惑於煽誘以陷于匪人苟究武威必示諸討而不開以自新雖欲改行爲善厥路亡繇是重朕不德也朕方願與民更始其獨安取此屈已弘物朕所不吝自今爲始應凡盜賊不

分首從苟從招安卽與原貸非特待之以不死
尊爵厚祿頒賞有差於戲古人有言亂匪降自
天人則爲之抑生人何辜非朕之不德無以至
此天怒於上人怨於下顧惟匪薄敢昧罪已凡
爾將帥尚咸諭朕意殺降戮順厥有重罰務在
綏輯以圖底于康寧用副朕思慝之誠廣朕好
生之德朕言不與其明聽毋忽

永樂 年 月 日

奉

天承運

皇帝詔曰朕承積累之體撫盈成之運臨御歲久望
治日深永惟前世之相沿各有當時之所尚三
代而上忠朴質文之累更兩漢以來名節經術
之異守或清淡之爲務或道學以相師便以因
循莫不久而成弊昧於張弛弗知變而後通爰
暨我朝所鑒往代然當法制之肇建實惟更議
之首遵小紀大綱固有昧而不紊前規後矩乃

畫一之是拘凡利害之所存必章程以爲據咸
樂相仍於苟且靡圖自獻於猷爲頃繇邇臣之
弊歟益使正塗之壅底持祿者括囊而拱默懷
姦者首鼠而依違茂蹇蹇之匪躬慕容容之後
福幾致防川之患寢成罔上之風覽習俗之至
斯嗟治體之已累朕當饋而歎反席以思仰祖
宗之貽謀本崇於信厚故國家之作則首務於
整齊勢無不弊之時道有好還之理咨予三事
羣牧暨爾衆僚庶士勉罄忠純各思厲翼毋牽

於忌諱言必由衷毋畧於幾微謀須慮遠共懲
膠柱之固滯庶求解弦而更張畢殫獻替之誠
允濟艱難之業今以爲始朕亦改圖綜核名實
之詳繼漢宣之遺則推行仁義而効揖唐后之
餘風期臻三代之隆永有萬年之譽朕言匪過
衆聽敢違

永樂 年 月 日

奉

天承運

皇帝詔曰朕惟君國之道事天爲大事天之實恤民
爲本我國家

聖聖相承

太祖高皇帝肇基垂統弘靖萬邦

太宗文皇帝繼志守成德威廣被天下無事生民又
安六十年於今矣是皆天地祐祚之隆祖宗功
德之盛肆及眇躬獲承鴻緒嗣位以來夙夜祇

皇明詩苑
慎上惟

天命之重下念生民之艱式嚴昭事庶臻康濟謹於
今年正月十五日恭祀

天地于南郊股肱助相羣工駿奔三靈交悅百順介
祥嘉與臣民均膺慶澤一應合行事宜條示于
後

一農桑衣食之本學校風化之原有司宜加
勸課在內從巡按御史在外從按察司巡
督毋爲虛文務臻實効

一祀典神祇皆爲保庇生民有司奉祭務在誠敬不許褻慢

一天下嶽鎮海濱及各處山川社稷等壇帝王陵寢先聖先賢忠臣義士旗纛城隍祠廟常須潔淨遇有損壞隨卽修理仍禁約不許樵採牧放

一軍民之間有孝子順孫義夫節婦合該上司審覆明白具其實跡奏聞以憑旌表
一軍民有鰥寡孤獨及篤廢殘疾無依之人

人所司常加存恤依例廩養母令失所
一有廉潔公正賢能幹濟之人未曾出仕或
屈在下僚許所在官司薦舉務得真才實
行以憑擢用不許徇私濫舉若考驗不中
或後犯贓罪原舉之人連坐

一文職官員自永樂二十二年八月十五日
以前有犯罪作辦事官及發充吏役承差
者並送吏部隨才授職但有贓罪者不在
此例

一武職官員子孫除應襲外其餘子弟果有德行可取才識優長者聽所在官司薦舉以憑取用

一文武官有因公幹在途病故者所在官司卽以禮棺歛遞送還家若在任病故家小不能還鄉官爲依律應付脚力送回勿令失所

一廣東珠池及各處官封金銀場并江西饒州燒造磁器官窑仍前禁止外其各處山

場園林湖池坑冶及菓樹蜂蜜等件原係民業曾經官府採取見今有人看守及禁約者詔書到日聽民採取不許禁約如有原看守之人各還職役

一官員父母有年七十之上家無丁力去任遙遠不能就養者許其明白具奏放回侍養待親終起復就用若不得離職願分祿於原籍支給奉養者聽從其便

一内外文職官員離家年久者許其明白具

奏挨次給假回還原籍省親祭祖

一文職官員年七十之上不能治事者許明白具奏放回致仕若無子嗣孤獨不能自存者其有司月給米二石養其終身

一自洪武至永樂年間有克軍擺站等項後因保舉起復爲官或見任或在病故或以禮去官皆免其戶下子孫補役見任年七十之上筋力衰憊者亦許引年致仕開其

軍伍

一天下諸司文武官吏俸給每石折支鈔二貫五伯文近來米價騰湧日用不給除原支本色米外其餘俸米每石折支鈔二十五貫候年豐糧積再行定奪

一朝廷建置文武官員所以統治軍民其間或有官非其人不得軍民之心而軍民動輒綁縛凌辱有傷大體今後凡有害軍害民官吏許被害之人赴合該上司陳告上司不爲准理許訴於朝不許擅自綁縛違

者治罪若受贓及造反謀逆及逃叛者聽
綁縛前來不拘此例

一城池之設所以禦暴衛民遇有坍塌損壞
隨即修理合用材料支給官鈔買辦不許
因而生事擾人若有坐視不行修理者聽
風憲官糾舉

一工部成造軍器遞年坐派各處買辦一應
物料多有未納自永樂十九年以前坐派
者悉皆罷免其二十年二十一年二十二

年坐派者免其一半以紓民力

一各處歲辦蘆柴除前蠲免外自今常額以十分爲率減其三分每歲正納七分實納本色二分其餘五分照依原行折收鈔貫每束收鈔五貫就送所在官庫收貯支用

一各處逃移人戶詔書到日卽回復業其戶下遞年拖欠稅糧悉與蠲免仍自復業之後再免稅糧差役二年如乏牛具種子者所司勸諭糧長里長并有力之家互相給

助耕種不許生事擾害其有比先私家債
負未還者限三年後一本一利交還不許
逼抑索取

一各處全戶充軍并全家死絕抄劄人戶遺
下空閒荒蕪田土無人佃種者所司務要
設法召人開耕待三年後方徵稅糧不問
官民田俱照本處民田例起科不許重加
科擾違者罪之

一各處衛所官軍俸糧近年有因水旱等項

皇明詔赦

洪熙元年

九

三

民間輸納未足倉無儲積以致官軍積欠
不得給用詔書至日各府州縣將承樂二
十年分拖欠稅糧各照當地時價聽民折
納鈔貫布絹頭畜等件就於本處官司收
貯仍查勘各衛所官軍遞年未關俸糧明
白見數挨次將前項折納物件依原折米
數給付官軍收用其支給餘剩之物儲貯
別用

一各都司衛所屯田官軍今後務依原定分

數下屯不許一槩差占失悞農葉年終從
監察御史按察司比較其間多有艱難辦
納子粒不敷今後除自用十二石之外餘
糧免其一半止納六石

一各處拘補軍役已有定制其有委係丁倒
戶絕者取其所在官吏執結回報衛所卽
爲轉達該府兵部以憑開豁毋得展轉勾
擾剝削無辜亦不許指此爲由一槩將有
丁之家徇私賣放空歇軍伍違者各治以

罪

一各處孳生馬疋舊例每年納駒一疋中間多有駒不及數者令其陪補積累年久貧無賠償者多至失所今聽兩年納駒一疋永爲定例若兩年納駒兩疋量爲賞鈔以旌其勤

一四川寶寧等府所屬茶課其原額官茶自洪熙元年以後皆照洪武年間例辦納價買民茶盡行罷免若官倉見積茶數堪中

換馬者仍留支用芽茶依當地時價作官
吏俸錢支銷其不堪換馬葉茶明白具奏
覆驗燒毀免致堆積累民

一各處遇有水旱災傷所司卽便從實奏報
以憑寬恤毋得欺隱坐視民患

一旌善申明亭所以勸善懲惡有司常加整
點遇有善惡明白書之庶以激勵風俗毋
徒視爲虛文

於戲郊禋致誠所以仰答靈貺陽春布德所以

順體乾元迎導至和發育庶品尚資有位咸懋
乃官推其仁愛之誠輔我太平之治詔告中外
咸使聞知

洪熙元年正月十五日

奉

天承運

皇帝詔曰朕恭承大統爲天下生民之主惟我

皇祖

皇考愛民之仁祇率不怠旦夕思念人命甚重哀矜
庶獄惓惓在懷夫刑以禁暴止邪導民於善豈
專務誅殺哉故律今之制善善長而惡惡短罰
之輕重咸適厥中顧執法之吏不能革平有虛
飾其情專致死罪而比附謬妄尤甚枉人朕甚

憫之夫五刑之條莫甚大辟大辟之施身首異處斯已極矣自今有犯死罪律該凌遲者依律科決其餘死罪止於斬絞法司並不許牽合傅會昧情失實以致冤濫若朕一時過於嫉惡律外用籍沒及凌遲之刑法司再三執奏三奏不允至於五奏五奏不允同三公及大臣執奏必允乃已永爲定制文武諸司自今亦不許恣肆暴酷於法外用鞭背等刑以傷人命尤不許用官刑絕人嗣續有自官者以不孝論且人之爲

非固有父子不相爲謀者肆虞舜爲君罰弗及
嗣文王之世罪人不孥自今惟犯謀反大逆者
依律連坐其餘有犯止坐本身毋得一槩處以
連坐之法古之盛世恒采民言用資戒警今兇
險之徒往往撫拾誣爲誹謗法吏刻深鍛鍊成
獄刑之失中民則無措今後但有告誹謗者一
切勿治爾中外文武羣臣宜端乃志悉乃心畏
天愛人務崇寬恕庶有以佐朕父母斯民之治
或有違者必罰不貸敷告天下咸使聞知

皇明詔制



卷之四

七

洪熙元年三月十五日

奉

天承運

皇帝詔曰朕承大統主宰天下上惟

天命之重下念生民之難夙夜憂勞唯恐一夫不得
其所屢詔求言冀達民隱而山東諸郡及淮安
徐州之境頻歲旱潦年穀無收民有乏於衣食
父母妻子不得相濟凍餒呻吟流于道路郡縣
之官漠不留意而又有科買之擾豈稱爲民父
母之道哉可全免今年夏稅其秋糧減半徵收

自今年四月以前各衙門一應收買及科派物件除桑穰仍納外其餘未到官者盡行停罷已到官者從實起解不許欺隱若實無見物而先已虛報在官者亦不許再科於民以足其數虛報之罪俱宥不問其郡縣之官務盡撫輯安養之宜毋縱貪刻以重困之庶幾副朕憫恤黎元之意故茲詔示咸使聞知

洪熙元年四月初三日